

Dasar-dasar
Adat Perpatih

OLEH . ABDUL RAHMAN BIN HJ. MOHAMMAD

dasar-dasar adat perpateh

untuk anak2-ku :

- *zarina*
- *zarida*
- *zariati*
- *zaziani*

DASAR-DASAR ADAT PERPATEH

oleh

Abdul Rahman bin Hj. Mohammad



1964

PENERBITAN PUSTAKA ANTARA
KUALA LUMPUR.

BAB IV

PECHAHAN2 SUKU DAN PERTADBIRAN-NYA

Satu2 Suku itu di-pechah2kan ka-dalam beberapa bagian atau pechahan2 kechil, yang di-panggil **Perut**; dan sa-terus-nya tiap2 satu Perut di-pechah2kan lagi ka-dalam **Ruang** dan sa-tiap Ruang di-pechah2kan lagi ka-dalam **Rumpun**.

Sa-tiap pechahan dalam sa-tiap Suku itu mempunyai tempat tinggal atau kampung yang tersendiri. Kampung ini kadang2 di-kenali dengan nama "**Tanah Lingkongan**", "**Tanah Telapakan**" dan "**Teratak**".

Walau pun pada lazim-nya pechahan2 dalam satu2 Suku itu tinggal dalam kampung2 yang berhampiran antara satu dengan yang lain, namun di-dapati-lah Rumpun2 dan Ruang2 dari sa-suatu Suku, yang tinggal dalam kampung2 yang berjauhan pula letak-nya antara yang sa-buah dengan yang sabuah lagi.

Rumpun2 dan Ruang2 itu, yang merupakan pechahan2 yang terkechil, di-ikatkan ka-dalam Perut2.

Sa-tiap Perut dalam satu2 Suku itu mempunyai ketua-nya masing2, yang di-beri gelaran **Buapak** (atau Ibu bapak). Sa-tiap anggota (atau ahli) dalam Perut itu di-kenali sa-bagai **Anak-buah**.

Sa-orang Buapak itu ada-lah bertanggung jawab terhadap segala soal pertadbiran dan pemerentahan dalam Perut-nya. Maka boleh di-katakan bahawa Buapak-lah yang memerintah dalam Perut itu.

Beliau ini di-pilih atau di-lantek oleh anak2-buah dalam Perut-nya sendiri, menurut persetujuan ramai dan bersama-sama.

Kesemua Perut2 itu pula sa-terus-nya di-ikatkan pula, atau di-gabungkan ka-dalam satu ikatan yang lebeh besar, ia-itu satu ikatan yang di-kenali sa-bagai **Suku**.

Sa-tiap Suku mempunyai ketua-nya tersendiri, yang memakai atau menyandang gelaran **Lembaga**. Lembaga ini-lah yang bertanggung-jawab terhadap segala hal yang berlaku dan yang di-lakukan dalam Perut2 yang bergabung dalam Suku itu.

Kesimpulan-nya, sa-tiap Buapak bertanggung-jawab terhadap pertadbiran dan pemerentahan dalam Perut-nya, sementara Lembaga bertanggung-jawab terhadap segala perkara yang berlaku dalam Suku pada kesalurohan-nya.

Lembaga ini juga di-pilih dan di-lantek oleh Anak2-buah menerusi Buapak2 mereka.

Maka itu-lah di-katakan bahawa: "Lembaga berlingkongan, Buapak beranak-buah, Anak-buah dudok bersuku2".

Dengan yang demikian semua Ketua (atau Pemimpin) dalam Suku dan Perut2-nya itu ada-lah di-pilih dan di-lantek menurut kehendak orang ramai (Anak2-buah) belaka.

Perbilangan Adat Perpatih pula menetapkan bahawa sa-tiap Pemimpin yang telah di-lantek itu sentiasa sahaja boleh di-pechat, kalau demikian-lah di-kehendakki anak2-buah itu, sebab kata Adat:—

"Yang di-lantek, boleh di-pechat".

Beberapa Soalan:

- (1) Buapak itu bagaimana tanggung-jawab-nya?
 - (2) Siapa pula yang bertanggung-jawab terhadap pertadbiran dalam Suku pada keselurohan-nya?
 - (3) Siapa-kah yang mengangkat sa-saorang itu menjadi Pemimpin?
 - (4) Bagaimana-kah kedudukan sa-saorang Pemimpin yang di-lantek itu?
-

PENUTUP

Penyusun ingin mengingatkan bahawa buku ini hanya mencheritakan "Adat Perpateh" itu pada dasar-nya sahaja, kerana perbedzaan2 kechil-kechilan di-sana sini tetap di-dapati dari "Adat Perpateh" yang di-pakai di-Naning dengan yang di-pakai dalam Luak2 Negeri Sembilan dan juga di-Minangkabau; seperti di-katakan oleh pepatah: "Lain padang lain belalang, lain lubok lain ikan". Akan tetapi pada dasar-nya belalang itu belalang juga dan ikan itu ikan juga; dan demikian juga pada dasar-nya "Adat Perpateh" itu ada-lah sama belaka keadaan-nya di-tiap-tiap Luak dan Negeri tersebut.

Berhubung dengan Bab Kesabelas, penyusun meminta ma'af kerana tiada dapat menghurai, membinchang dan mencheritakan kesah "Raja Tiada Bernegeri" itu dengan sa-penoh-nya, kerana ia-nya sa-benar-nya merupakar sejarah Negeri Sembilan, yang sudah tentu akan lebeh sesuai di-binchang dan di-huraikan dalam sa-buah buku sejarah pula.

Di-sini juga penyusun ingin menyatakan bahawa susunan dan kekuasaan pemerintahan seperti telah di-cheritakan itu ada-lah yang telah betul2 di-jalankan di-waktu para penganut "Adat Perpateh" itu telah memerintah negeri2 mereka sendiri.

Kita semua tentu ma'alam bahawa sejak orang2 Minangkabau, Naning dan Negeri Sembilan di-perintah oleh Kuasa2 Penjajah (Belanda dan Inggeris), kuasa2 "Undang", "Lembaga" dan "Buapak" itu sudah banyak di-rampas dan di-perkechilkan.

Hari ini mereka itu hanya mempunyai kuasa menguruskan perkara2 kecil sahaja.

Kita juga terlebih ma'alam bahawa "Adat Perpateh" itu merupakan Falsafah Hidup satu bangsa "Petani".

Maka sama ada Falsafah Hidup itu sesuai atau tidak untuk satu masyarakat yang hidup "Dalam zaman Perindustrian"—seperti zaman yang kita tempoh sekarang—tiadalah penyusun bermaksud membinchangkan-nya pula.